

Carl de Freitas motor tras di varios banda

Carlos "Carl" de Freitas, a bay laga nos e siman aki y mañan su entiero ta tuma lugar.

Carl de Freitas, homber cu pa decadanan a para tras di diferente banda musical di nos isla y tambe tabata un di e lidernan di grupo di carnaval di nos isla, patrocinador di varios evento musical y social y un conocedor grandi di musica di calypso y roadmarch di varios isla den Caribe y di e diferente carnavalnan caribense.

Si mi kier a sa kende a gana concursionan di calypso of roadmarch riba cualquier di e islanan di Caribe, ta Carlos mi mester a yama pasobra e tabata biba cu esaki.

E tabata bishita carnavalnan di exterior y na Aruba tabata un placer pa scuche papia di cada un di nan.

Carlos de Freitas tabata un comerciante riba diferente tereno y ultimamente relaciona cu contratistanan den refineria.

E tabata dirigi e grupo di carnaval Pa Tin Pret cu tabata presenta cu su banda musical "Sound and harmony" cu tabata un di e bandanan grandi riba nos isla, principalmente den temporada di carnaval y e concursionan.

For di Sound and Harmony a lanta despues bao di su direccion tambe The Aruban Band cu tambe tabata tin su grupo di carnaval y cu tabata hopi popular tambe.

Despues cu The Aruban Band a kibra ya cu varios integrante a bay forma parti di otro gruponan, el a forma e banda Spice & Company.

E banda aki por bisa tabata e prome paso di formacion despues di Oreó di Claudius Philips.

For di e banda aki a sali e tempo ey dos Oreó te cu un di nan a carga nomber di Oreó Original pa motibonan discuti entre nan e tempo ey y a yega na e Oreó di awe di Claudius Philips y e otro a cambia bira e banda musical Ricochet.

Bandanan di Carl a toca hopi pa grupo di carnaval di Esso, y Carl mes tabata un colaborador grandi di e grupo di carnaval aki cu a gana cantidad di premio den paradanan y cu a caba algun aña pasa cu Valero a stop di patrocina e grupo.

Carl tabata e motor tras di creacion di e agrupacion musical



Impak cu e aña aki a haci furor grandi den carnaval y dos aña pasa a participa tambe cu un grupo di mucha den carnaval cu animacion musical di Impak.

E tabata colaborador tras di cortina pa su ruman cu a forma Taxx in the Maxx hopi aña pasa, cual grupo a bira popular cu e cancion cu a ser prohibi despues "Boxdown Satan".

For di Taxx in the Maxx a bin forma despues e banda NBO di Kevin James cu awe ta un di e bandanan mas grandi di temporada di Carnaval, mientras cu otro miembro cu ta Antoni Gario di su banda a bay forma le Groove.

Tabata conoci pa algun luna caba cu Carlos de Freitas, cu tur hende conoce como Carl, tabata malo, pero ningun hende por

a pensa cu e malesa cu el a sufrí di dje lo a pone cu diripiente el a sufrí un atake di curazon y fayece.

For di dialuna, especialmente na San Nicolas, den conversacionnan Carl su nomber continuamente tabata bin dilanti y hendenan cu a conoce tabata comenta di tur locual e tabata haci riba nos isla riba tereno social, y di e mannan cu e tabata duna sin cu tabata conoci cu e tabata envolvi.

San Nicolas a perde den Carl un figura "colorido" pa e exitacion energetico di dje na momento di discuti topiconan di interes. E tabata conoci como un persona cu no ta tapa si e kier expresa algo pa proba su punto. E tabata vlot den su palabranan y frasenan y maske cuanto bo discuti cune, e no ta baha cabez pa su opinion y pensamiento te ora cu e mustrabo su punto bon cla.

E tabata un persona hopi calmo, cu ta scucha cu tur tranquilidad, pero ora mishi cu topiconan di cual e ta mas na altura cu e otronan, mes ora e ta bira e "orador di oido", esta cu bo mester scuche prome.

Conoci di dje tambe ta cu ora e ta robez y bo mustre cu ta asina, e ta acepta tambe sin bay contra.

Hopi cu a conoce bon desde chiquito lo haya su falta y hopi otro lo keda menciona su nomber den conversacionnan bisando sigur: "Si Carl tabata aki e lo a..." etc.

Na su yiuinan y nietonan y su rumannan y demas familia ta bay palabranan di profundo condolencia y cu Carl sosega den paz di Señor.

Juby Naar.